

Date – 13/12/2025

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Chief Minister Pu Lalduhoma chuan zu leh ruihhlo vangin Mizo thalai an thi tam tih a sawi a, ruihhlo chu nasa zawka do a ngaih thu leh a zuar thinte chu dim an ngai lo tih a sawi bawk.
2. Mizoram Rural Bank chuan nimin khan cheng vaibelchhe sing khat Total Business an tlin an lawm a, chief secretary Pu Khilli Ram Meen chuan a hman pui.
3. Sawrkar laipui chuan kum 10 chhungin thlai tharchhuah zat chu zaa 44 in a pung a ti.
4. Union Cabinet chaun kum 2027 ram inchhiarpui Census atana hman tur Budget cheng vaibelchhe 11,718 a pawm.



CM

Chief Minister Pu Lalduhoma chuan zu leh ruihhlo vangin Mizo thalai an thi tam tih a sawi a, ruihhlo chu nasa zawka do a ngaih thu leh a zuar thinte chu dim an ngai lo tih a sawi bawk.

Pu Lalduhoma hian nizan khan Lammuala Mizoram Youth Festival chu hman puiin, Mizorama Pathian lal ram a thlen daltu lian tak chu zu leh ruihhlo a nih thu a sawi a. Ruihhlo vangin nula leh tlangval hna thawk thei rual Home-ah tam tak an awm chuan a rilru a ti na thin tih a sawi a, ruihhlo chu huaisen leh nasa zawka do a ngaih thu leh a ti thin tute tan sim theih a ni tih a sawi.

CM chuan Mizoram Youth Festival chu thalai chi hrang hrang Biak In khata lawi ho ngai lo te Pathian faka inpawl hona hun remchang a nih thu a sawi bawka a ni.



GOLDEN JUBILEE

Serlui bialtu MLA Pu Lalrinsanga Ralte chuan nimin khan Govt Buhchangphai Middle School kum 50-na Golden Jubilee lawmna a hman pui.

Pu Lalrinsanga Ralte chuan, kal khawmte chu an pian leh murna chu khaw lian tak a nih loh pawhin tumruhna leh taimakna an neih tlat chuan mi ropui tak a nih theih tih hre turin a chah a, zirna chu hmasawmna hrang hrang thlentu leh in nghahna a nih thu sawiin, zirna chuan an dinhmun leh nih phak loh thleng mi a nih tir thei a. Zirna chu kuthnathawh pumpelhna tur a nih loh thu leh hnathawh hreh nei lo leh zahpui lo tura inzirtirna a nih zawk thu a sawi bawka.

MLA chuan tunlai khawvelah Certificate tha neih ringawtin hna tha a hmuh theih tawh lova, thiamna tak tak neih a ngaih zawk thu leh sawrkar hna ringawta inngat lo tura zirlaite chahin lehkhathiam chuan hna dang pawh thawk se; an tan thil tih a awlsam thin tih hre reng tura fuihin Naupangte'n aia upa zahna leh nun kawng tha an zirna leh rinna kawnga anmahni kaihruaitu chu zirtirtute an ni tiin, zirtirtute chu thahnem ngai taka an mawhphurhna hlen chhuah tum turin a chah a ni.

Andrew Vanlalauva (Kolasib PTC)



MRB

Mizoram Rural Bank chuan nimin khan cheng vaibelchhe sing khat Total Business an tlin an lawm a, Mizoram chief secretary Pu Khilli Ram Meen chuan a hman pui.

MINECO-a MRB Head Office Auditorium-a hun hmanah, Chief Secretary Pu Khilli Ram Meena chuan, MRB-te'n vaibelchhe singkhat zet mai business an nei thei chu mellung pakhat mai ni lovin an inpekna, tei rei peihna leh thawh hona tha lanchhuahna a nih thu a sawi a. Tuna Bank dinhmun a that thu te, Net NPA 0% a ni thei leh CRAR 16.80% a ni theite

chu lawmawm a ti a. Nasa zawka thawk zel tur leh Mizoram Rural Bank chu mipuite dinhmun tha zawka hlangkaitu ni zel se a duh thu a sawi baw.

Mizoram Rural Bank Chairman Pi Sheryl L. Vanchhong chuan, kum 1983-a din MRB chuan tun dinhmunah District 11-ah Branch 106 a neih tawh thu leh Financial Inclusion-ah te, Sawrkar laipui leh State Sawrkarin ruahmanna a siam hrang hrangte tihlawhtlingtu leh Bank dangte nena khaikhin pawha a titha ber pawl an nih thu a tarlang a. Mipuite rin ngam Bank-ah hian anmahni duhsaktute avanga vaibelchhe singkhat business an tlin thei chu lawmawm a tih thu a sawi.

Nimina hun hmanah hian India rama Regional Rural Bank 28-te tana Logo angkhat an siam chu tlangzarh nghal niin he Logo hi Mizoram Rural Bank pawhin nimin atangin a hmang tan dawn a ni.

Cheng vaibelchhe singkhat business nei tur hian Branch hrang hrangte'n theihtawp an chhuah a, tehna hrang hrang hmanga Branch titha 19-te hnenah chawimawina an hlan nghal a. Vaibelchhe singkhat business nei tura thawh hlawk bik mi 2-te hnenah chawimawina hlan an ni.

DIPR

<><><>

HANDHOLDING SCHEME

Mizoram sorkar flagship programme Bana Kaih (Handholding) Scheme Phase-II ah progress partner ni tura dilna 40,928 a lut tawh.

Adviser to CM (Handholding) Dr KC Lalmalsawmzauva hnen atanga Akashvani News, Aizawl thudawn danin, Bana Kaih Phase-II ah December ni 11 thleng khan progress partner ni tura dilna 40,928 a lut tawh a, heng dilnate hi loan component hnuai dilna 481 leh Chief Ministers Special Package hnuai dilna 40,447 an ni.

Bana Kaih Phase-II hnuai loan component diltu 481 hi mimal anga dil 458 leh pawl anga dil 23 an ni a; CM Special Package diltu 40,447 zinga 40,435 hi mimal anga dil niin, pawl anga dil 12 an awm baw a ni.

Dr KC Lalmalsawmzauva chuan Phase II hnuai loan dilna lut hi a concerned department ten an endik mek avangin Bana Kaih Scheme-a thuneitu sang ber Apex Body-in Phase-II hnuai progress partner dilna pawm an la neih rih loh thu a sawi.



PRISON DEPARTMENT

Mizorama jail 10-ah táng mi 1,680 an awm mek a, jail tangte hi mipa 1,488 leh hmeichhia 180 bakah an nute tàn vanga jail-a awm ve naupang 12 an ni a; Central Jail Aizawl chu jail tang thei zat bituk aia tang mek zat tam berna a ni.

Mizoram Prison department hnuaia Jail 10 hi mi 1496 tan theihna tura ruahman ni mah se, niminah kha chuan mi 1,680 an tang mek a, jail tang mek zingah hian damchhunga tang tura hrem mipa 56 awmin, hrehawm taka tang tura an chungthu rel mi 372 leh tan pangngaia tang tura an chungthu rel mi 259 bakah an chungthu ngaihtuah mek mi 981 an awm a ni.

Hmeichhe jail tang 180 zingah hian damchhung tang tura hrem an awm lo a, hetihlai hian hrehawm taka tang tura hrem 32 awmin, tan pangngaia tang tura hrem 14 leh an chungthu ngaihtuah mek 134 an awm a; Central Womens Jail, Champhai District Jail, Kolasi District Jail leh Serchhip District Jail-ahte dan bawhchhiat vanga an nute tàn vanga jail-a awm ve naupang 12 an awm bawk a ni.

Mizorama Jail lian ber Central Jail hi mipa 480 tan theihna tura ruahman ni mahse vawiin dinhmun ang chuan mi 855 an tang mek a, bituk zat aia tang mek zat tamna hi 375 a ni. Hetihlai hian Siaha District Jail, Kolasib District Jail, Lawngtlai District Jail, Serchhip District Jail leh Mamit District Jail-ahte tang thei tur bituk zat aia tlem an tang mek a; mi 98 tan theihna tura ruahman Lawngtlai District Jail-ah mi 21 tang mekin, bituk zat atanga chhûtin tang mek zat hi za zela 21 point 43 a ni a, bituk zat aia tang mek zat tlem berna district a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



CM RELIEF FUND

Kum 2023 December ni 18 atanga kumin thlengin Chief Minister's Relief Fund (CMRF)-ah mimal leh pawl hrang hrangin cheng nuai 279 chuang an chhunglut tawh a; CM Refief Fund atang hian pawl leh mimal engemzaw zat hnenah tanpuina cheng nuai 220 point 88 pek chhuah a ni tawh.

Chief Minister's Office-in a tarlan danin, kum 2023 December ni 18 atanga chhiarin CM Refief Fund-ah hian pawl leh mimal hrang hrang 356-in online, cheque leh pawisa tlang hmangin cheng nuai 279 point 27 an chhung lut a; sorkar kum kal mekah kumin April ni 1 atanga vawiin thleng khan mimal leh pawl 80-in cheng nuai 31 point 33 an pe tawh a ni.

CM Refief Fund-a sum chhunluhte hi kawng hrang hranga hman a ni a; CMO-in a tarlan danin December 21, 2023 atanga chhiarin CM Refief Fund atang hian mimal leh pawl hrang hrang 1,105 hnenah tanpuina cheng nuai 220 point 88 pek a ni tawh a; sorkar kum kal mekah mimal leh pawl 411 tanpui nan cheng nuai 42 point 28 hman a ni tawh bawk.

CM Refief Fund kaltlanga tanpuina sum hi damlo, khawsak harsa, home leh hmeithai in sak tanpuina atan te, damdawi-ina damlo awmna ba rullhna atan te, oxygen concentrator, wheelchair leh bengdâr leina atan te, raltlan relief camp sakna atan te, Cyclone Remal vanga chhياتna tâwkte leh leimin/lungrem chim siamthatna atan te, vantlang hnatlang puihna atan te, rialin in chung a den chhiatte rangva leina atan te, sabereka khuangkaih vanga in chhia sakthatna leh tuikawng chhia siamthatna atan te, Central YMA Disaster Response Team mamawh leina atan leh thil dang hrang hrang atante pekchhuah thin a ni.



AGRICULTURE

Sawrkar laipui chuan kum 10 chhungin thlai tharchhuah zat chu zaa 44 in a pung a ti. Nimina Rajya Sabha zawhna leh chhanna hunah Union Agriculture Minister Shivraj Singh Chouhan chuan zawhbelhna chhangin he thu hi a sawi a. Hetianga thlai thar a punna chhan hi thlai chi thar hman uar vangte, tunlai thiamna leh loneih dan thar hman vang anih thute a sawi a. Sawrkarin agriculture sector lamah nasa taka hmasawna thlen turin theihtawp a chhuah thu a sawi a ni.

(NewsonAIR)



CENSUS

Union Cabinet chaun kum 2027 ram inchhiarpui Census atana hman tur Budget cheng vaibelchhe 11,718 a pawm. Union I&B Minister Ashwini Vaishnaw chuan hemi chungchang hi New Delhi-a chanchinbumite a kawmnaah he thu hi sawiin Census 2027 chu thawh hniha kalpui a ni dawn a ti a. Tun tum inchhiarna hi a Cesus vawi 16 na tur a ni tih sawiin ram zalen a neih hnuah a vawi 8 na a ni a ti a. Caster Enumeration pawh Census 2027 ah hian telh a ni dawn tih sawiin tun tum inchhiarah hain a vawi khat nan digital census kalpui tur niin thawktu hi nuai 30 chuang an awm dawn tih a sawi bawk.

(NewsonAIR)

